



**ЎЗБЕКИСТОН РЕСПУБЛИКАСИ**  
**ОЛИЙ ВА ЎРТА МАХСУС ТАЪЛИМ ВАЗИРИНИНГ**  
**БУЙРУҒИ**

20 20 йил “17” март

№ 326

Тошкент ш.

**Хотин-қизлар масалалари**  
**бўйича маслаҳат-кенгашларини**  
**тузиш тўғрисида**

Ўзбекистон Республикаси Президентининг “Жамиятда ижтимоий-маънавий муҳитни соғломлаштириш, маҳалла институтини янада қўллаб-қувватлаш ҳамда оила ва хотин-қизлар билан ишлаш тизимини янги даражага олиб чиқиш чора-тадбирлари тўғрисида” 2020 йил 18 февралдаги ПФ-5938-сон Фармони ва “Ўзбекистон Республикаси Маҳалла ва оилани қўллаб-қувватлаш вазирлиги фаолиятини ташкил этиш тўғрисида” 2020 йил 18 февралдаги ПҚ-4602-сон Қарори ҳамда 2020 йил 24 апрелдаги Ўзбекистон Хотин-қизлар кўмитаси Конференциясининг қарори ижросини таъминлаш мақсадида

**Б У Ю Р А М А Н:**

1. Вазир ўринбосарлари, вазирлик тизимидаги бўлинмалар, ташкилотлар, ҳудудий бошқармалар, олий таълим муассасалари ва филиаллар раҳбарлари Ўзбекистон Республикаси Президентининг “Жамиятда ижтимоий-маънавий муҳитни соғломлаштириш, маҳалла институтини янада қўллаб-қувватлаш ҳамда оила ва хотин-қизлар билан ишлаш тизимини янги даражага олиб чиқиш чора-тадбирлари тўғрисида” 2020 йил 18 февралдаги ПФ-5938-сон Фармони ва “Ўзбекистон Республикаси Маҳалла ва оилани қўллаб-қувватлаш вазирлиги фаолиятини ташкил этиш тўғрисида” 2020 йил 18 февралдаги ПҚ-4602-сон Қарорига мувофиқ, 2020 йил 24 апрелдаги Ўзбекистон Хотин-қизлар кўмитаси Конференцияси қарорига кўра Ўзбекистон Хотин-қизлар кўмитаси фаолияти тугатилганлиги муносабати билан Олий ва ўрта махсус таълим вазирлиги тизимидаги Хотин-қизлар кўмитаси бошланғич ташкилотлари фаолияти тугатилганлигини маълумот учун қабул қилсин.

2. Вазирлик тизимидаги ташкилотлар, ҳудудий бошқармалар, олий таълим муассасалари ва филиаллар раҳбарлари, академик лицейлар директорларига **бир ҳафта** муддатда хотин-қизлар масалалари билан бевосита масъул бўлган **Хотин-қизлар масалалари бўйича кенгаш** (кейинги ўринларда –Кенгаш) тузсин.

3. Хотин-қизлар масалалари бўйича Кенгаш тўғрисидаги Намунавий низом иловага мувофиқ тасдиқлансин.

4. Вазирлик тизимидаги ташкилотлар, ҳудудий бошқармалар, олий таълим муассасалари ва филиаллар раҳбарлари, академик лицейлар директорларига:

-2020-2021 ўқув йилига мўлжалланган Кенгаш иш режасини ишлаб чиқиш ва тасдиқлаш;

- Кенгаш раисига (жамоатчилик асосида) Хотин-қизлар масалалари бўйича раҳбар (ректор, директор) маслаҳатчиси мақомини бериш;

- Кенгаш раиси учун алоҳида хона ажратиш, компьютер, телефон, интернет тармоғи ва бошқа жиҳозлар билан таъминлаш ҳамда ўрнатилган тартиб асосида иш ҳақиқа қўшимча устама белгилаш орқали моддий рағбатлантириб бориш вазифалари юклансин.

5. Ушбу буйруқ ижроси назорати вазир ўринбосари Ю.Абсоатов зиммасига юклатилсин.

**Вазир**



**И.Маджидов**



Вазирликнинг 2020 йил “17” июлдаги  
326 -сонли буйруғига илова

## Олий ва ўрта махсус таълим вазирлиги тизимидаги Хотин-қизлар масалалари бўйича Кенгаш тўғрисида НАМУНАВИЙ НИЗОМ

### I. УМУМИЙ ҚОИДАЛАР

1. Мазкур Намунавий низом (кейинги ўринларда Низом деб юритилади) Олий ва ўрта махсус таълим вазирлиги тизимидаги **Хотин-қизлар масалалари бўйича кенгаш** (кейинги ўринларда – Кенгаш) асосий вазифалари, функциялари, ваколатларини мазкур Низомга мувофиқ тасдиқланган иш режа асосида ташкил этиш тартибини белгилайди ва шу бўйича иш олиб боради.

2. Кенгаш хотин-қизларни ижтимоий сиёсий қўллаб-қувватловчи, уларнинг ҳуқуқ ва қонуний манфаатларини ҳимоя қилувчи шунингдек Ўзбекистон Республикаси Конституцияси ва Қонунларида ўз аксини топган ижтимоий сиёсий кафолатларнинг амалга оширилишига кўмаклашувчи жамоатчилик асосида доимий фаолият юритувчи Кенгаш ҳисобланади

3. Кенгаш таркиби Олий ва ўрта махсус таълим вазирлиги, Касбий таълимни ривожлантириш ва мувофиқлаштириш ҳудудий бошқармалари, таълим муассасалари ректорлари ва филиаллар директорларининг йиғилиш қарорлари билан ташкил этилади ҳамда унга киритиладиган ўзгартишлар йиғилиш раиси томонидан тасдиқланади.

4. Кенгаш қарорлари тавсиявий хусусиятга эга.

5. Кенгаш ўз фаолиятида Ўзбекистон Республикасининг Конституцияси ва қонунларига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президентининг фармонлари, қарорлари ва фармойишларига, Ўзбекистон Республикаси Вазирлар Маҳкамасининг қарорлари ва фармойишларига, Ўзбекистон Республикаси Олий ва ўрта махсус таълим вазирлигининг меъёрий ҳужжатларига, мазкур Низомга ва бошқа қонун ҳужжатларига амал қилади.

6. Кенгаш қонунийлик, коллегиялик, ошкоралик, ўзаро ҳамкорлик ва ҳурмат, тенг ҳуқуқлилик, ихтиёрийлик ва жамоатчилик фикрини ҳисобга олиш тамойиллари асосида фаолият юритади.

### II. КЕНГАШНИНГ АСОСИЙ ВАЗИФАЛАРИ ВА ФУНКЦИЯЛАРИ

7. Хотин-қизларни қўллаб-қувватлашга доир давлат сиёсатининг самарали амалга оширилишини таъминлаш, уларнинг ҳуқуқлари ва қонуний манфаатларини ҳимоя қилиш ҳамда уларнинг мамлакат ижтимоий-сиёсий ҳаётидаги роли ва фаоллигини ошириш ишларини ҳамкорликда ташкил этади;

- хотин-қизларнинг меҳнат жамоаларида, давлат ва жамоат бошқаруви соҳасидаги ролини кучайтириш, уларни ижтимоий-ҳуқуқий жиҳатдан қўллаб-қувватлаш борасидаги мақсадли ишларни ташкил этишга кўмаклашиш ва уларнинг фикрларини тизимли мониторинг қилиш;

- хотин-қизларнинг муаммоларини ўз вақтида аниқлаш, ёрдамга муҳтож ва оғир ижтимоий аҳволга тушиб қолган хотин-қизларнинг, шу жумладан, ногиронлиги бўлган аёлларнинг манзилли рўйхатларини тузиш,

уларга ижтимоий-ҳуқуқий, психологик ва моддий ёрдам кўрсатиш, реабилитация воситалари билан таъминлаш ишларига кўмаклашади;

- ёшларни оилавий ҳаётга тайёрлаш, уларга оиладаги низоли ҳолатларни ҳал қилишнинг ҳуқуқий ва психологик асосларини ўргатиш, оилаларни мустаҳкамлаш, эрта никоҳ ва оилавий ажралишларнинг олдини олиш бўйича таклифлар ишлаб чиқишга ва тегишли чора-тадбирларни амалга оширишга ёрдамлашади;

- хотин-қизлар ва эркеклар учун тенг ҳуқуқ ҳамда имкониятлар кафолатлари тўғрисидаги қонун ҳужжатларининг ижроси юзасидан жамоатчилик назоратини амалга оширади ва тегишли таклифлар ишлаб чиқади;

- хотин-қизларни тазйиқ ва зўравонликдан ҳимоя қилиш тўғрисидаги қонун ҳужжатлари ижросини мониторинг қилади, зўравонликдан жабрланганларни аниқлаш, уларни реабилитация қилиш, ҳуқуқларини ҳимоя қилиш бўйича ишлаб чиқилган тавсиявий таклифларни вазирликка киритади;

- хотин-қизларни тазйиқ ва зўравонликдан ҳимоя қилиш соҳасида ҳудудий дастурларни ишлаб чиқиш ҳамда амалга оширишда иштирок этади;

- Талаба қизларни оилавий ҳаётга тайёрлаш, ёш оилаларни ижтимоий фаолликка йўналтириш, улар ўртасида ижтимоий фойдали меҳнат тури билан шуғулланадиган, ибрат намунасига эга бўлган хотин-қизларнинг ҳаёт фаолиятлари ва турмуш тарзларини кенг тарғиб қилиш;

- хотин-қизлар ўртасида турли кўрик-танловлар ва спорт мусобақаларини ўтказиш, Зулфия номидаги Давлат мукофоти ва “Мўътабар аёл” кўкрак нишони билан тақдирлаш учун номзодларни танлашда қонунийлик, ижтимоий адолат, шаффоқлик тамойилларига риоя этилиши устидан таъсирчан жамоатчилик назоратини амалга оширади;

- миллий ва халқаро қонунчиликда хотин-қизлар ҳуқуқларини ҳимоя қилишга доир ҳужжатлар, стандартлар ва талабларнинг жорий этилишини таъминлайди ва бевосита иштирок этади;

- тизимида самарали меҳнат қилаётган аёл ходимларни Давлат мукофотларига тавсия этиш бўйича таклиф киритади.

### **III. КЕНГАШНИНГ МАЖБУРИЯТЛАРИ**

8. Кенгаш ўз зиммасига юкланган вазифаларга мувофиқ қуйидаги мажбуриятларни бажаради:

- ўз фаолиятини Ўзбекистон Республикаси қонунчилиги ва мазкур Низомга мувофиқ амалга ошириш;

- жамоатчилик назорати тўғрисидаги Қонун ҳужжатлари талабларига риоя этиш;

- фуқароларнинг ор-номуси ва кадр-қимматини таҳқирлашга, уларнинг шахсий ҳаётига аралашишга йўл қўймаслик;

9. Кенгаш Қонун ҳужжатларида назарда тутилган бошқа мажбуриятларга ҳам эга бўлиши мумкин.

### **IV. КЕНГАШНИНГ ҲУҚУҚЛАРИ**

10. Кенгаш қуйидаги ҳуқуқларга эга бўлади:

- жамият ва давлат ҳаётида фаоллик ва ташаббускорлик кўрсатган, ўзининг самарали меҳнати билан оиланинг тотувлиги ва фаровонлиги мустаҳкамланишига, оналик ва болалик муҳофазасига муносиб ҳисса қўшган, шунингдек, соғлом ва

баркамол авлодни вояга етказиш, уларни Ватанга садоқат руҳида тарбиялаш, жойларда маънавий-ахлоқий муҳитни соғломлаштириш ва миллий қадриятларни кенг тарғиб этиш борасида ибратли фаолият олиб бораётган хотин-қизларни “Мўътабар аёл” кўкрак нишони билан тақдирлаш юзасидан Олий ва ўрта махсус таълим вазирлигига таклифлар киритиш;

- Олий ва ўрта махсус таълим вазирлигига Кенгаш ваколатига кирадиган масалалар юзасидан таклифлар киритиш;

- хотин-қизлар, айниқса ёрдамга муҳтож ва оғир ижтимоий аҳволга тушиб қолган хотин-қизлар, шу жумладан, ногиронлиги бўлган аёллар учун назарда тутилган имтиёзлар ҳақидаги қонун ҳужжатларининг ижроси устидан жамоатчилик назоратини амалга ошириш;

- зиммасига юклатилган вазифалар ижроси самарадорлигини ошириш мақсадида таълим муассасасида хотин-қизлар ўртасида турли кўрик-танловлар ва спорт мусобақаларини ташкил этиш ва ўтказиш;

- таълим муассасасидаги хотин-қизлар, айниқса ёрдамга муҳтож ва оғир ижтимоий аҳволга тушиб қолган хотин-қизлар, шу жумладан, ногиронлиги бўлган аёлларнинг розилиги билан уларнинг уй-жой ва ижтимоий-маиший шарт-шароитлари билан танишиш;

- Кенгаш мажлисларида муҳокама қилинадиган масалаларни ёритиш бўйича оммавий ахборот воситалари билан ҳамкорлик қилиш;

- юклатилган вазифаларни бажариш учун семинарлар, давра суҳбатлари ва бошқа тадбирларни ташкил этиш, зарур ҳолларда уларга давлат органлари ва жамоат ташкилотлари масъул ходимларини ҳамда маҳалла фаолларини таклиф этиш.

11. Кенгаш қонун ҳужжатларига мувофиқ бошқа ҳуқуқларга ҳам эга бўлиши мумкин.

## **V. КЕНГАШ ФАОЛИЯТИНИ ТАШКИЛ ЭТИШ ТАРТИБИ**

12. Кенгашга белгиланган тартибда кенгаш раиси бошқаради.

13. Кенгаш раиси хотин-қизларнинг яширин овоз бериш йўли билан учдан икки қисмининг берган овози билан сайланади.

14. Кенгаш таркиби ҳар 3 йилда тасдиқланади ва 10-21 нафар аъзодан иборат таркибда шакллантирилади

15. Кенгаш раислари:

- Кенгаш фаолиятига умумий раҳбарлик қилади;

- Кенгаш мажлисларини чақиради ва кун тартибини белгилайди, мажлисга раислик қилади;

- Кенгаш иш режаларини, мажлис баённомаларини ва бошқа ҳужжатларини тасдиқлайди, мажлис Қарорларининг ижросини назорат қилади;

16. Кенгаш фуқароларнинг ўзини ўзи бошқариш органлари ва бошқа давлат органлари ҳамда жамоат ташкилотлари билан ҳамкорлик қилади;

17. Кенгашга раиси бўлмаган тақдирда, унинг ваколатлари ва мажбуриятларини раис ўринбосари бажаради.

18. Кенгаш мажлиси иш режа асосида ҳар ойда камида бир марта чақирилади;

- Кенгаш раисининг ташаббуси ёки кенгаш аъзоларининг учдан бир қисмининг ёзма мурожаати асосида унинг навбатдан ташқари мажлисини чақириш назарда тутилади.

19. Кенгаш мажлисларига бошқа давлат органлари, нодавлат нотижорат ташкилотлар ва фуқаролик жамияти институтларининг вакиллари, маҳалла фаоллари таклиф этилиши мумкин.

20. Кенгаш мажлисида қабул қилинган Қарор баённома билан расмийлаштирилади.

21. Кенгаш раиси олий таълим муассасаси илмий кенгаши аъзоси сифатида йилига бир марта ҳисобот беради.

## **VI. КЕНГАШ РАИСИ МАҚОМИ**

22. Кенгаши раиси раҳбарнинг (ректор, директор)нинг “Хотин-қизлар масалалари бўйича маслаҳатчиси” мақомига эга.

23. Кенгаш раиси учун алоҳида хона ажратиш, компьютер, телефон, интернет тармоғи ва бошқа жиҳозлар билан таъминлаш ҳамда ўрнатилган тартиб асосида иш ҳақиға қўшимча устама белгилаш орқали моддий рағбатлантириб бориш чоралари қўрилади.

## **VII. ЯКУНЛОВЧИ ҚОИДАЛАР**

24. Кенгаш фаолиятини моддий-техник жиҳатдан таъминлаш қонун ҳужжатларида тақиқланмаган манбалар ҳисобидан амалга оширилади.

30. Кенгаш фаолияти унинг низомига ва Ўзбекистон Республикасининг қонун ҳужжатларига мувофиқ ҳолда амалга оширилиши Олий ва ўрта махсус таълим вазирлиги томонидан назорат қилинади.